

**Tuanku Hajah Haminah Gemar Beriadah Dan Bersukan
Bernama
10 April , 2012**

KUALA LUMPUR, 10 April (Bernama) -- Di sebalik raut wajahnya yang tidak pernah lekang menguntum senyuman dan terkenal dengan sifat penyayang, Raja Permaisuri Agong Tuanku Hajah Haminah adalah seorang permaisuri yang gemar beriadah dan bersukan.

Baginda diputerikan pada 15 Julai 1953 di Bagan Serai, Perak menerima pendidikan awal di Sekolah Kebangsaan Matang Jelutong, Bagan Serai, dan Sekolah Menengah Inggeris Bagan Serai.

Baginda meminati permainan skuasy, tenis, dan badminton. Namun, golf adalah sukan yang paling diminati.

Baginda pernah menjadi johan pada Pertandingan Golf Piala Bapa Malaysia pada tahun 1987.

Atas kesungguhan serta minat mendalam baginda dalam sukan itu, baginda sering menjadi pendorong kepada pelbagai pertandingan golf wanita di negeri Kedah.

Walaupun begitu, Tuanku Hajah Haminah yang diijabkabulkan dengan Tuanku Abdul Halim Mu'adzam Shah pada 25 Disember 1975 tidak pernah melupakan tanggungjawab baginda sebagai seorang sultanah, isteri dan juga ibu.

Dalam melayari rutin seharian di istana, baginda lebih gemar melakukan sendiri kerja hiasan dalaman bagi memastikan persekitaran istana teratur, kemas dan bersih.

Tuanku Hajah Haminah sering mencari kesempatan untuk memasak resipi kegemaran Tuanku Abdul Halim dan keluarga.

Baginda telah dikurniakan gelaran Yang Mulia Che Puan, dan pada tanggal 9 Januari 2004, dimasyhurkan sebagai Sultanah Negeri Kedah Darul Aman dengan gelaran Kebawah Duli Yang Maha Mulia Sultanah Hajah Haminah Hamidun berikutan kemangkatan Tuanku Sultanah Bahiyah pada 26 Ogos 2003.

Sebagai Sultanah Kedah, baginda juga tidak pernah melepaskan peluang mengiringi Tuanku Abdul Halim berangkat ke majlis-majlis rasmi Kerajaan dan melawat daerah-daerah di negeri itu.

Baginda juga begitu aktif dalam kegiatan sosial dan kebajikan dengan menjadi Penaung Diraja Persatuan Pandu Puteri Malaysia dan Lembaga Kebajikan Perempuan-Perempuan Kebangsaan dan penaung bagi Lembaga Kebajikan Perempuan Islam Negeri Kedah, Persatuan Pandu Puteri Negeri Kedah, Persatuan Ibu Tunggal Negeri Kedah, Woman Institution.

Baginda amat prihatin dengan perkembangan semasa kanak-kanak.

Atas inisiatif baginda sendiri sebuah yayasan kebajikan yang bermatlamat membela

kanak-kanak kurang bernasib baik terutamanya anak-anak yatim telah ditubuhkan dan dinamakan Yayasan Anak-anak Yatim Sultanah Hajah Haminah.

---BERNAMA

Hakcipta © 2012 BERNAMA

Source:<http://www.bernama.com/bernama/v6/bm/newsindex.php?id=658327>